

THE HONOLULU ARI

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 12.

Ditema, 1924.

Mat. 18.

E teie nei, te vai nei te faaroo, e te tiaï, e te aroha, e toru ra; o tei hau râ i taua toru nei, o te aroha ia. Korinetia I, 13:13.

Te Aamu No Te Aroha

I ROTO i te hoé pô vero rahi, te tia maira na taata e tootoru i te opani o te hoé fare. Ua faaroohia hoi ta ratou patotoraa, e iriti maira te hoé tamahine mārû i te opani, mai te ui mai i to ratou mau i'oa, e to ratou tere hoi.

Parau atura te taata matamua o teie pue taata nei: "O Te Aroha ia to'u i'oa, e o to'u na hoa e toopiti nei, o Te Tura ia tei'oa o te tahi, e o Te Taoâ ia te i'oa o te tahi. Te imi nei matou i te hoé faaeearaa e te maa hoi. E nehe-nehe hoi i te hoé o matou i te parahi i roto i to outou utua-fare i teie pô, mai te peu ra, na oe iho e maiti i taua hoé ra."

Ua maere ihora te tamahine; pii atura oia i te melo atoa o te utua-fare ia haere mai e tauturu i te maitiraa i te hoé o teie nei na taata e tootoru nei. Putuputu maira ratou, e haapao ihora i te hoé apooraa, mai te feruri e, o vai mau ta ratou i hinaaro ia parahi i ô ratou ra, o Te Aroha anei, e Te Tura anei, e Te Taoâ anei?

Maoro aéra, pâpû ihora to ratou manaó. Ua ví hoi to ratou nonnou, e te teoteo, e te aau teitei, i te paari mau; e parau anaé atura ratou e, "Ua hinaaro hoi matou i Te Aroha."

I toratou fariiraa rá i Te Aroha, o te tomoraa ia o ratou e tootoru atoa, Te Aroha, e Te Tura, e Te Taoá, i roto i te fare. Hió atura Te Aroha i to te utuafare maere rahi, parau atura oia ia ratou: "Eiahá e maere; i te mau utuafare atoa i farii-maitai-hia'i Te Aroha ei manihini no ratou, ei reira atoa to'u na hoa e toopiti nei, Te Tura e te Taoá, e faaea tamau ai."

E haamaitaihia ihora taua utuafare ra i roto i te mau matahiti i muri atu.

Te Faaoraraa I Tei Pohe

I TE tau i faahoíhia mai ai te Evanelia i te ao nei, i roto i te matahiti 1820, te faaroo noa ra te rahiraa o te mau haapaoraa e, eita e noaa te ora mure ore i te taata nei, maori rá na roto i te faíraa i to ratou faaroo ia Iesu Mesia ra a ora noa'i ratou i te tino nei. E te feia'toa i pohe ra, o tei ore i faí i to ratou faaroo Ia'na, tei ia ratou hoi te faahaparaa mure ore. E mai tei au i teie manaó, te taata'toa o tei ore i haapiihia i te Evanelia i to ratou oraraa i roto i teie nei ao, ua faaere-roa-hia ia ratou i te ora mure ore ra.

E hióraa ê roa teie, e te mea au ore roa i te aroha o te Metua, e i te haapiiraa hoi a to tatou Fatu. Na roto i te mau heheuraa i ite ai tatou e, te ohipa rahi e te hanahana a te Fatu ra, o te faatupuraa ia i te tahuti-ore-raa e te ora mure ore o te taata nei. Teie hoi te opuaraa rahi o te Fatu ra, ia faaorahia Ta'na atoa ra mau tamarii, o tei tapu te tatarahapa i roto i to ratou aau, ia roaa hoi ia ratou te hoé tufaa i roto i To'na ra basileia, mai tei au i ta ratou mau ohipa i rave.

Eita iho â te taata nei e faaorahia, maori râ na roto i te haapaoraa i ta te Evanelia nei; e na roto hoi i te haapaoraa tamau i te mau faaueraa a te Fatu e faateiteihia'i tatou. Te faaite mai nei te parau a te Atua e, "Ia tuu te mau turi atoa i raro, i te i'oa o Iesu ra; e ia fa'i te mau vaha atoa e, o Iesu te Fatu." (Philipi 2:10-11.) E mea pâpû e, e ere ia i to te Fatu opuaraa ia faahepo noa i te taata ia tuu i to ratou mau turi i raro, mai te peu ra, aore i noaa ia ratou te ravea e faaroo ai i te mau parau No'na i to ratou oraraa nei. Eita iho â Oia e tuu noa ia ratou i roto i te pohe mure ore, ia faaite-noa-hia To'na mana rahi.

Ua na ô maira Petero e, "E fa'i ratou i te parau ia'na, i tei ineine i te haava mai i tei ora e tei pohe. I parau-atoa-hia'tu ai hoi te evanelia i te feia i pohe ra, i faahapahia'tu ai ratou e te taata i te tino ra, te ora ra râ ratou i te Atua i te Varua ra." (Petero I, 4:5-6.) E mai te mea e, e haavâhia ratou o tei pohê mai i te taata i te tino nei, e mea pâpû roa ia e, e roaa ia ratou te ravea no te fariiraa i te mau oroa atoa o te Evanelia i haapiihia mai i te taata i te tino nei.

Ua parau atura Iesu ia Nikodemo e, "Ia ore te taata ia fanau i te pape e te varua e ore oia e ô i te basileia o te Atua ra." E mea mure ore ta te Fatu mau ture, e ia haapao te taatoaraa e tia'i, o tei ora, e o tei pohe atoa. Te au-raa no te parau bapetizo, o te utuhiraa ia i raro i te pape; e o te pape ra, o te hoé ia mea rii tumu o teie nei ao; no reira, aita i nehenehe i te feia pohe ia bapetizo-tino-hia mai i roto i te pape o teie nei ao. Te mau oroa'toa o te Evanelia i haapaohia no te pae tino nei, ia ravehia ia i roto i teie nei ao e tia'i. E nehenehe noa i te taata ia haapiihia i te Evanelia, e ia faaroo, e ia tatarahapa hoi, oi vai ai oia i roto ia Paradaiso ra; aita râ e nehenehe ia'na ia bapetizohia i reira.

E no reira hoi, ua horoa maira te Atua i te mana i

Ta'na Ekalesia i te ao nei, e riro ai tatou, o tei haapao i taua parau nei, ei mau faaora no ratou o tei pohe ma te ite ore e te faaroo ore i te Evanelia a te Mesia ra. To tatou ia haamaitairaa ia haere i roto i te mau hiero o te Atua, a rave ai i te mau ohipa faaora no to tatou mau pohe, o te ore e oti ia ratou i hora. E mai te mea e farii mai ratou i teie mau ohipa Evanelia i roto i te ao varua ra, e ite-mau-hia ia ratou e te Atua, mai te mea ra e, na ratou iho ia i rave. E na reira te feia i pohe, o tei tupu to ratou faaroo ia Iesu Mesia e tei tatarahapa i ta ratou mau hara, i te faaorahia, mai ia tatou atoa i te tino nei.

Ua parau maira te Peropheta ra o Iosepha Semita e, "Te ohipa rahi ta te Atua i tuu mai i nia iho ia tatou nei, o te imiraa ia i to tatou feia i pohe ra." No te feruriraa tia e ite ai tatou e, o te parau mau teie, no te mea e, no te ta-ata'toa hoi te ora mure ore, ia faaroo e ia tatarahapa ratou, te feia ora, e te feia pohe atoa hoi, mai te peu ra aore ratou i patoi noa'tu i te ture ra. O te ora mure ore ia te taoá aroha rahi a te Atua ra, e i te mea hoi, eita e oti i te feia i pohe te haapao i te mau oroa Evanelia no teie nei ao, tei ia tatou o te ora noa nei teie ohipa faaora, na roto i te monoraa ia ratou i te haapaoraa i taua mau oroa moá nei. Ua heheu-atoa-hia mai e, eita e roaa te ora ia tatou anaé ra, maori râ e faaora-atoa-hia to tatou feia i pohe ra. E no reira, e ohipa rahi e te faufaa hoi tei vaiihohia mai na tatou nei.

Ua haapaohia hoi te utuafare ia vai tamau â i roto i te ao varua ra e a muri noa'tu; e no reira, e ere ia no te pape-tizoraa anaé teie ohipa; maori râ no te faaipoiporaa atoa, e no te tuatiraa, e no te faatoroaraa, no te feia ora e te feia pohe atoa hoi. Aita'tu vahi i roto i te ao nei e haapaohia'i teie mau oroa moá, maori râ i roto i te mau hiero o te Atua ra.

(E mai te peu ra, aita e nehenehe ia tatou ia tae tino atu i te mau vahi e vai ra te hiero o te Atua, e nehenehe noa hoi ia tarahu atu i te tahi mau taata no reira, mai te haponu atu

i te i'oa o to tatou mau pohe, ia riro ratou ei mono no tatou i te raverā i taua mau ohipa ra.)

E ia farii tatou paatoa i teie faaueraa, mai te rave i teie ohipa no tatou iho, e no to tatou feia i pohe ra, e faaorehia'i ta te Atua tairiraa i te fenua nei i te ino, a tae atu ai i taua mahana mataú rahi a Iehova ra, mai tei tohubia mai e Malaki ra. (Malaki 4:1-6.) (Taio atoa i Ioane 3:5; 5:25-29 Petero 1, 3:18-20; 4:6: Buka Fafau S. 109 e te 110; Philipi 2:10.)

—*Faaauhia e Hebera Foutera.*

Te Tahī Mau Huru no te Ekalesia Mau

(Tuatiraa teie nei parau.)

¶ E Orometua Haapīi Parau Tuatapapa: E ere anei tena parau hopea i te mea huru mauruuru ore i te Fatu ra? Orometua Porotetani: No te aha?

Te Orometua Haapīi Parau Tuatapapa: No te mea e, mai tei au i te parau tuatapapa o te ao nei, na te feia iino i haamou i te tiaraa tumu mau no te Ekalesia, e tae noa'tu i te mau aposetolo e te mau peropheta i tuuhia ei upootia no'na ra. Nate feia iino te mau aposetolo i taparahi. Ua faasataurohia P'etero; ua tapu-ê-hia'tu to Iakopo upoo; ua heehia Ioane; ua faasataurohia Anederea, ratou e Philipi, e o Simona; ua tairi-pohe-roa-hia Baretolomea; ua patia-pohe-roa-hia Toma i te maehae; ua taparahihia Mataio i te opahi tamaí; ua tairi-pohe-roa-hia Iakopo Iti; ua tapu-ê-hia'tu te upoo o Paulo; ua pehi-pohe-roa-hia Baranaba i te ofai. E no te maramarama e te pâpû o teie parau tuatapapa, e ere anei ia i te mea faatura ore i te Atua ia parau mai oe e, e ere ia i to te Atua opuaraa ia vai tamau te mau aposetolo e te mau peropheta i roto i te Ekalesia i muri aê i te tau matamua o te haapaoraa Cherisetiano ra?

Te Pīpī no te Haapiiraa: Oia mau ia, e no nia hoi i te parau tuatapapa moá ra, e tae iho â ia to tatou manaó i te parau mau, oia hoi e, ua haapaohia te mau aposetolo e te mau peropheta ûrûhia ra ia vai tamau ratou i roto i te Ekalesia a vai noa'i taua tiaraa a te Atua ra i nia iho i te fenua nei. Ua ite hoi tatou e, ua maitihia Matatia ei mono no Iuda, ia'na i mairi ai i roto i te hara ra. (Ohipa 1:26.) E ua riro atoa hoi o Paulo raua o Baranaba ei na aposetolo a te Fatu ra. (Ohipa 13: 1-3.)

Orometua Porotetani: Area râ, aita e faufaa to te mau aposetolo e te mau peropheta i teie nei anotan. E mau haapiiraa teitei e te haapiiraa Evanelia ta tatou i teie nei, e na roto i te reira e faaineine-maitai-hia'i te mau orometua no te ohipa orometua ra.

Te Pīpī no te Haapiiraa: Aita râ ta oe parau i au maitai i te parau a te Atua. Ua na ô pâpû maira Paulo e, "E ua tuu hoi te Atua i te aposetolo i roto i te Ekalesia, o mua ia, e te piti ra e peropheta ia." (Kor. I, 12:28.) E vai anei te Ekalesia, mai te peu ra, aita teie na toroa faufaa rahi i tuuhia ei upoo no'na ra? E i roto hoi i taua iho â pene 12 no Korinetia ra, faaauihori Paulo i te Ekalesia i te tino tata nei, mai te parau e, aita i tia i te hoé melo no taua tino ra ia parau atu i te tahi e, "Ore noa'tu â oe ia'u nei." (Korinetia I, 12:21.) E i ta'na papairaa'tu i to Ephesia, na ô atura oia e, ua tuuhia te mau aposetolo e te mau peropheta i roto i te Ekalesia, "ei faaaui i te feia moá i te ohipa ra e orometua, ia tupu i te maitai te tino o te Mesia ra." (Ephesia 4:12.) E mea tia anei ia rave i te ohipa orometua i teie nei mau mahana? E mea tia anei ia faatupu i te maitai i te tino o te Mesia ra? Mai te mea ua tia, ei reira e mea faufaa te mau aposetolo e te mau peropheta o tei tuuhia i roto i te Ekalesia no taua iho â mau ohipa faufaa rahi ra.

Orometua Porotetani: Area te parau ra Paulo no te ohipa orometua i roto i to'na ihora tau; eiaha râ ia vai noa

te mau taata ûrûhia i roto i te Ekalesia i muri aé i to'na anotauro ra.

Te Pîpî no te Haapiiraa: Te parau nei anei oe e, ua tae mau te faaroo o te mau Cherisetiano i te mea hoé?

Orometua Porotetani: Aita; eiaha roa'tu ia.

Te Pîpî no te Haapiiraa: Mai te au râ i ta Paulo parau, ia vai tamau â te mau aposetolo e te mau peropheta i teie atoa nei tau e tia'i no te mea ua faaite pâpû maira oia e, e vai tamau ratou i roto i te Ekalesia e tae noa'tu i te taime, "ia riro tatou atoa nei ei taata paari, i te faaroo hoé e te ite hoé i te Tamaiti a te Atua, ia taea te faito ra i te î o te Mesia i te rahi." (Ephesia 4:13.) Ua faaite atoa'tura o Paulo i te Ephesia e, ua patuhia ratou "i nia iho i te niua te mau aposetolo e te mau peropheta ra." (Ephesia 2:20.) E teie nei, e nehenehe anei ia vai noa te Ekalesia e aita hoi e niu?

Mamu ihora te Orometua Porotetani ra.

Te Orometua Haapii Parau Tuatapapa: A faaite mai na oe, eaha mau ia te faufaa no te mau peropheta i to tatou nei anotauro?

Te Pîpî no te Haapiiraa: Tera ia; ua titau-noa-hia ratou ia iriti pâpû mai i te mau parau a te Atua i papaihia ra, e ia faaite atoa mai i te parau e te hinaaro o te Atua ra no nia i te mau mea aore ê â i haamaramaramahia mai; e ia haapâpû mai i te ohipa ta te mau orometua e rave i to tatou nei anotauro; e ia faaite mai hoi i te mau mea e tupu i te tau a muri atu, e faaarahia'i e e maitaihia'i hoi te Feia Moá ra; e tae noa'tu i te parauraa'tu i te taata i te ohipa ra ei orometua.

Orometua Porotetani: Te parau nei anei oe e, aita i tano ia aó noa te taata i te Evanelia, maori râ ua parauhia oia na roto i te hoé peropheta?

Te Pîpî no te Haapiiraa: Oia mau ia.

The Orometua Porotetani: No teihea mana oe i parau mai ai i taua parau na?

Te Pîpî no te Haapiiraa: No te mana o te Bibilia moá

ra. E faatia iho â oe e, ua maitihia Petero ratou o Iakobo e o Ioane, e tae noa'tu i te taatoaraa o te mau aposetolo na roto i te mana o te Atua ia aó atu i te Evanelia ra.

Orometua Porotetani: A, e; oia mau iho â ia.

Te Orometua Haapii Parau Tuatapapa: Nahea mau râ to ratou parau-raa-hia?

Orometua Porotetani: Ua parauhia ratou e Iesu iho.

Te Pīpī no te Haapiiraa: Te reira mau ia. E e peropheta hoi Iesu o tei tonohia mai e te Atua ra.

Te Taata Haapii Ture: E nahea râ to Matatia parau-raa-hia, oia tei riro ei mono no Iuda ra?

Te Pīpī no te Haapiiraa: Ua parau-atoa-hia oia na roto i te mau peropheta, oia hoi, te mau aposetolo, tino ahuru ma hoé ra, e e mau peropheta anaé ratou. (Ohipa 1:26.) Aita 'tu â ravea mana e parauhia'i te taata nei no te ohipa ra ei orometua Evanelia. Ua faaite pāpū atura o Paulo i te mau Hebera e, "E aore roa e taata e rave noa i teie tura no'na iho, maori râ o tei parauhia e te Atua mai ia Aaron a ra." (Hebera 5:4.) E ua parauhia Aaron a na roto i te peropheta ra ia Mose. (Exodo 28:1.) Teie hoi te huru mau no te parau-raa-hia te mau taata ei orometua haapii Evanelia i roto i te Ekalesia a Iesu Mesia; e o te hoé ia tapao pāpū no te Ekalesia mau. Area, te mau ekalesia i faatiahia e te taata nei, ua maiti ratou ia ratou iho ei orometua haapii evanelia mai te maiti-noa-raa o te tahi mau taata ia ratou iho ei haapii ture, e ei taote, ei ravea noa hoi e noaa'i ia ratou te moni. I roto râ i te Ekalesia mau, ua parauhia te mau orometua e te Atua na roto hoi i To'na ra mau peropheta. E na te mau taata tei ia ratou mau te mana ia haamau i raro nei, e e haamau-atoa-hia ia i te ao ra, teie mau orometua i faatoroa no te aó atu i te Evanelia a te Mesia ra. (Mataio 16:19.)

—*Faaauhia ei re'o Tahiti e Elavana*

(E tuatihia teie nei parau.)

Te Mau Parau Apî

Ua tupu aénei i roto i te hoé tufaa no te fenua Amerika te hoé puahiohio riàriá rahi roa; e pohe ihora na taata e hoé tausani e iva hanere; e te faufaa no te mau fare, e te mau taoá atoa i pau, ua tae roa ïa i te moni rahi ra e ono ahuru ma piti milioni dara moni Amerika.

Te tere atura te pahi rahi Beritani ra o Palmella, a itehia'i e, ua puta, e te tahe maira te miti i roto i te pahi ra. Mehameha aéra te taata'toa i tana pahi ra, mai te manaó e, o to ratou ïa poheraa. Muri rii maira râ, faaea ihora te miti i te tahe mai i roto i te pahi, e tere noa'tura ratou ma te peapea ore, e tapae noa'tura i te oire ra i Hull, i Beritani. Ei reira te pamuraa te miti i rapae i te pahi, e te iteraa hoi e, e puhi rahi tei roto i te apoo i tahe mai ai te miti ra. No te tapea-raa-hia tana puhi ra i roto i te apoo, i opani hia ai te miti, e i faaorahia'i hoi te pahi e te taata'toa.

Parau Faaite

Te faaite atu nei o TAU tane, i te taata atoa e, ua haamau a'enei oia i te hoé Fare Hamaniraa Pereoo Taataahi, e te Auraa Auri, taura hoé e te taura piti atoa hoi, e e rave rahi atu â ta'na mau ohipa rii i ite i te hamani.

O te mea pâpû râ o te haere tino roa mai ïa e farerei ia Tau no te mau mea rii e hinaarohia.

O tei parahi i te fenua atea, a haponu mai i te mau ohipa rii tata'i, na Tau tane te reira e rave, e mea haraviti mau ia oti.

TAU Tane

*Tei pihai iho ta'na fare i te Neneirua Vea a Coulon
I te aroa e haere ti'a i nia i te e'a turu i te pâ*

Faaiteraa no Ruru

Ia hinaaro outou i te tape'a, e te uati, noa'tu te huru;

Ia hinaaro outou ia hamanihia to outou mau tape'a, te pine, te tautau;

Ia hinaaro outou ia tataihia to outou mau tape'a;

Ia hinaaro outou i te hoo mai i ta outou mau tiko, te patoetoe, te mau tape'a tahito, te hei pupu, etc.;

Ia hinaaro outou ia papaihia to outou mau i'oa i nia e aore râ i roto i to outou mau tape'a, te pine, e te tautau;

Ia hinaaro outou ia faaapîhia to outou mau tape'a tahito;

Haere i o Ruru

*to'na iho â fare parai rea ute
te aroa Petite Pologne*

PAPEETE

NENEIRAA HOHO'A

Noa'tu te huru e te faito i hinaarohia, e oti nehenehe i ò nei ia Viriamu.

O te mau huru ohipa ho-ho'a e ravehia nei.

William Crake

I pihaiho i te Fare Moni Initia Taina

PAPEETE

Ua tae maira te parau e, te faaineine ra te Hau Iapone i te ravea e opani-etaeta-hia'i te mau huru ava paari i roto i to ratou mau fenua. Ua noaa ia ratou te ite pâpû i teie nei e, aita hoi e ravea e manuïa'i ratou, maori râ ia faa-ore-roa hia te taero ava i rotopu ia ratou ra. Na roto i teie opuaraa matamua a te Iapone, aita'tu ava e faatiahia, maori râ te "sake," te ava tumu ïa no te Iapone, e te pia, e te uaina.

I roto i te tufaa fenua Utaha i Amerika, ua itea aénei te ivi no te hoé mau animala rarahi roa. Te imi ra te tahi pûpû taata no roto mai i te haapiiraa teitei no Utaha ra i te mau mea tahito no te fenua, a itea mai ai taua mau ivi ra. Ua heruhia ihora te ivi taatoa no roto mai i te fenua e te ofai, e afaihia'tura i te haapiiraa teitei ra; ei reira ïa i hamani-faahou-hia'i ei mau animala, mai tei te matamua ra; e te vai ra ïa i roto i te haapiiraa i teie nei ei mataitairaa no te taata. E hoé ahuru ma iva pereoo rahi i roa no te afairaa atu i taua mau ivi ra; e ua manaóhia e te mau orometua haapiiraa e, na milioni matahiti i mairi aénei te oraraa taua animala rarahi ra.

Tei roto hoi i te oire ra Roma, i te fenua Italia, te hoé fare pureraa rahi Katorika, o Petero Moá te ióa i mairihia i nia iho. E te vai ra i taua fare pureraa ra te hoé opani i parauhia i te "opani moá," e aore roa ia i iritihia taua opañi ra, maori râ i te 25 o te matahiti; e inaha, i te hopea o te matahiti 1924, o te taime mau ia no taua oroa rahi ra. No reira, i te 24 no Ditema nei, patoto aturu te pope rahi Katorika i taua opani ra, ma te hoé hamera auro, e ua iritihia atura hoi te opani, e o te haereraa ia ratou atoa i roto ra.

Ua pohe aènei te hoé taata rahi Farani, o Emile Ber-gonie to'na i'oa. Ona te hoé o te mau taata matamua i itea ia ratou te metalo faufaa rahi ra o radium; e faaunaunahia ihora oia e te Hau Farani no ta'na ohipa maitai i rave i roto i te ao nei. E mea taero hoi teie metalo radium, e no ta'na rave-noa-raa i taua mea ra i taerohia'i to'na manimani rima i te matamua, a tapu-ê-hia'tu ai ia; e i muri maira, taero-atoa-hia to'na na rima, e ua tapu-atoa-hia to'na na rima e piti atoa. Tamau noa ihora râ oia i ta'na ohipa, e maitaihia ai te ao nei, e tae noa'tu i to'na poheraa.

Tao'a Apî Farani

Mea rahi te taihaa apî no nia mai i te pahi rahi Farani.

Pereoo taataahi tane
e te vahine—te au'a
e te mereti—e ua rau
te huru te ahu Fara-
ni ana'e.

Tihota Tahiti Hoo Mama
Fare Toa No Aiu.

FARE TAMAARAA TINTO

Tatahi tei fatata i te fare toa no Pute

Teie te Hooraa

Te mau roi auri, roi raau, roi veo;
Te mau afata ume, afata roa, afata
raau noanoa, afata ma'i (pohe);
Te mau huru UPAUPA, Mando-
line, Guitare, Ukulele, e to'na
mau niuniu atoa;

Te mau huru peni vaa, Fare, Pere-
oo, Afata Ume, e te tahi atu â.
Tei reira'toa hoi te hamani raa e te
tatairaa i te mau huru haneti atoa.
Tei reira'toa te mau hahu raa, e te
êê raa raau.

Tei reira'toa te tarahu raa Pereoo
uira: taniuniu noa io Bambridge,
Papeete, ia tae atu te Auto, no-
a'tu te hora i te pô e te ao.

Bambridge, Dexter & Co.

oia hoi io TIHOTI MAEHAA

Ua Faaroo Tatou

I te parau apî o te tauî o te moni Marite e te moni Beritane—e no reira ua pee te moni o te mau taihaa i nia.

Mea Mama ta Pute

Ua hamani atoa taua faretoa ra i te hoê pua apî re'are'a—NATUA—te i'oa, na te hoê taata ite roa i te rapaau no Marite raua o Jones E. O. Maker taua pua maitai ra i rapaau e i hamani.

E Piti Toata i te Pâ

A. Leboucher

PAPEETE

Tamuta Hamani Pahi e te Fare

Mai te mea e, te opua nei oe i te hoo i te tahi poti tere roa a'e i te tahi atu â mau poti, haere io PERO, oia hoi, F. R. & I. E. WALKER, na ratou e hamani i taua poti ra ma te maitai e te hoo māmā.

Haere na a mataitai i ta ratou mau hoho'a poti, haere na a mataitai i ta ratou aua hamaniraa pahi.

Farerei na ia PERO ma, no te hamaniraa i to oe fare, eita oe e tata-rahapa.

Afai na ta oe mau iri raau i hinaro i te êê e te hahu ia PERO ma, na ratou e rave.

F. R. & I. E. WALKER

PAPEETE

Na ô maira te parau apî no Amerika mai e, te opua ra te taata rahi moto ra o Jack Demsey ia vaiiho atu i te ohipa motoraa. E mea maoro aênei te imiraa i te hoê taata moto e au ia'na, e aita i itea; e no reira, tupu ihora te mana'o e, e faaea oia i taua ohipa ra. Arau aé râ tatou e pâpû ai e, parau mau anei, e aita anei.

Te faaite maira te Tavana Rahi Amerika no te mau fenua moana ra o Philippines e, i roto i te matahiti i mairi aênei, ua faaora-faahou-hia mai na lepera e 300 i roto i taua mau fenua ra. O te ahuru ia o te tufaa o te mau taata i roohia e taua maî riariâ ra i reira; e te faaite maira te mau taote e, e ora faahou mai e 300 taata maî i teie nei mau avae i muri nei. Te ani atura te Tavana i te Hau Amerika ia horoa'tu e hoê milioni dara na ratou, e oti maitai roa'i to ratou fare maî, e e ora roa'i te taata oovi atoa i taua mau fenua ra, e tae noa'tu i te taata oovi i roto i te ao atoa nei.

O. B. Peterson, Imprimeur,

Rue Brea et de la rue Dumont d'Urville, Orovini, Papeete